



Aningaasaqarnermut, Aatsitassanut, Ikummatissanullu Naalakkersuisoqarfik
Aatsitassanut Suliassaqaqarfinnut Avatangiisinut Aqutsisoqarfimmut

Qeqertarsuatsiaat kujataani misissueqqissaarnissamut akuersissut nr. 2015/15 pillugu tusarniaanermut Kommuneqarfik Sermersuup akissutaa.

Kommuneqarfik Sermersuumi Isumaginninnermut, Suliffeqarnermut Inuussutissarsiornermullu Ingerlatsiviup Qeqertarsuatsiaat kujataani guultimut aligunullu aappaluttunut misissueqqissaarnissamut akuersissut nr., 2015/15 pillugu tusarniaanermut atorlut tiguai suliaralugillu, periarfissinneqarluni ulloq 8. januaari 2015 tikitsinnagu akissuteqarnissaminut, qujavorlu tassunga tusarniaanermut ilassuteqarnissaminut periarfissinneqarami.

Tusarniaanermut akissuteqarsinnaasutut allanneqarsimasut taamaallaat pisortaqaarfiupput tassungalu atatillugu kattuffiit iluaqusiisussanngorlugit ilanngunneqarsimasinnaagaluarput soorlu GA, SIK, ICC, KNAPK, TPAK, Timmiaq aamma Avataq. Tamakku tusarniaanermut ilassuteqartussanngorlugit periarfissinneqarsimasariaqaraluarput aamma tusarniaanerup siunertarisariaqaraluarparu sapinngissamik naleqquttut amerlanerpaat peqataatinneqarnissaat. Nunap immikkoortuani tamaani annikitsumik ingerlatsinissaq annertuumik soqutigineqarpoq taamaattumik atorlussat tamanit pisarsarineqarsinnaasariaqaraluarput. Aamma isornarpoq nunap immikkoortua tamanna qinnutigineqartoq Namminersorlutik Oqartussat akuersissutinut nalunaarsuiffiani nunap assingani imaluunniit Nunagisip aatsitassarsiorinissamut akuersissutinut nalunaarsuiffiani ilaatinneqanngimmat.

Nunap assigani ilanngunneqartumi takuneqarsinnaavoq nunap immikkoortuani qinnutigineqartumi tassani kisermaassillutik annikitsumik ingerlatsiniartunut akuersissutit arlallit aamma piummata, tamannalu ajornartorsiut tusarniaanermut atorlussani sammineqanngilaq. Ilisimaneqanngilaq tamanna ajornartorsiutinik sunik nassataqarumaarnersoq ingerlatsiviulli piumasarissavaa pisinnaatitaaffiit tunniunneqareersunut ingerlatassanullu annikitsunut qinnuteqaatit aalajangiusimaneqassasut.

Nunap immikkoortuata qinnuteqarfigneqartup toqqaannartumik killeqarfianiipput eqqissisimatitat "Ikkattoq aamma kitaaniittut qeqertat". Nunap immikkoortuata tamatumap imartaa ikkattuvoq timmissanut arlalinnut pingaaruteqartoq taamaattumik sapinngissamik akornusersornaveersaartari-aqarpoq.

Suliniupmut atatillugu sulisussanik atorfinitsitsinnermut tunngatillugu kommunip pingaartorujusuartut isigaa nunaqavissunik sulisussarsisoqartarnissaa aamma KS ingerlaavartumik suliniut pillugu ilisimatinneqartassasoq.

Tusarniaanermut atatillugu akissutissat allaffimmi suliarineqarput politikerinillu suliarineqareerpat allanngortoqarsinnaanera eqqaamaqquneqarpoq.

Grethe Nielsen

Isumaginninnermut, Suliffeqarnermut Inuussutissarsiornermullu Ingerlatsivik Pisortaq